

**Sumáriu Kazu****Tribunál Judisiál Primeira Instáncia Dili****Juñu 2024**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Díli**1. Totál kazu ne'ebé JSMP monitoriza: 14¹**

Artigu	Tipu Kazu	Númeru
Artigu 145 Kódigu Penál (KP) & artigu 2, 3, 35 no 36 Lei Kontra Violénsia Doméstika (LKVD)	Ofensa ba integridade física simples ho natureza Violénsia Doméstika (VD) no tipu ilísitu sira kona-ba violénsia doméstika	7
Artigu 172 KP	Violasaun seksuál	1
Artigu KP	Aktu seksuál ho adolexente	3
Artigu	Devasa	1
Artigu 154	Maus-tratus ba kónjuje	1

¹ Totál kazu 14 ne'e la representa totál kazu ne'ebé Tribunál Judisiál Primeira Instáncia Díli julga iha fulan Juñu 2024.

Artigu 155	Maus-tratus ba menór	1
Totál		14

2. Totál desizaun ne'ebé JSMP monitoriza: 7

Tipu desizaun	Artigu	Númeru
Pena multa	Artigu 67 KP	3
Suspensaun ba prizaun nia ezekusaun	Artigu 68 KP	2
Pena prizaun	Artigu 66 KP	1
Absolve		1
Totál		7

3. Totál kazu sira ne'ebé sei kontinua prosesu tuir JSMP nia monitorizasaun:6

B. Deskrisaun sumáriu julgamentu ba desizaun kazu sira

1. Krime ofensa ba integridade fízika simples ho natureza VD

Nú. Prosesu : 0063/24.DICMR
 Kompozisaun Tribunál : Singulár
 Juis : Dr. João Ribeiro
 Prokuradora : Dra. Ivonia M. Guterres
 Defeza : Dra. Agustinha Oliveira
 Desizaun : Pena multa US\$60.00

Iha 21 Juñu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza VD ne'ebé envolve arguidu SAdJG hasoru nia feen, iha Munisípiu Dili.

Akuzasaun Prokuradora

Prokuradora akuza katak iha 25 Janeiru 2024, iha oras tuku 14:38 lokraik, arguidu basa iha lezada nia hasan karuk, tuku dala ida iha kanuruk, arguidu kontinua hodi ai-sar baku dala lima iha lezada nia ulun parte kotuk no dudu lezada monu ba kama leten. Arguidu mós tuku lezada nia kanuruk dala ida. Antes problema ne'e akontese arguidu husu ba lezada katak tanba sa mak fila ona hosi serbisu maibé nafatin konversa ho kolega serbisu.

Prokuradora akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarata katak foin primeiravés mai hatan iha tribunál, arrepende ninia hahalok no deklarata mós katak hafoin akontesementu ne'e, bainhira fila hosi edefisio polísia arguidu husu ona deskulpa ba lezada no agora dadaun sira moris hamutuk nafatin hanesan feen ho la'en.

Alende ne'e, lezada kontinua konfirma faktu hotu iha akuzasaun no deklarata katak di'ak malu ona ho arguidu no moris hamutuk nafatin hanesan feen ho la'en.

Alegasaun finál

Prokuradora konsidera arguidu provadu komete krime hasoru lezada, bazeia ba konfisaun arguidu nian no konfirma hosi lezada, arguidu halo duni agresaun fízika hasoru lezada, haree mós sirkunstánsia atenuante ne'ebé haleu hela krime ne'e, nune'e husu ba tribunál atu kondena arguidu ho pena prizaun tinan ida suspende ba tinan ida fulan neen.

Entretantu, defeza husu ba tribunál atu kondena arguidu ho pena admoestasaun tanba arguidu kolabora ho tribunál, arrepende ninia hahalok no di'ak malu ona ho lezada.

Desizaun

Depoizde avalia faktu hotu, tribunál prova katak, arguidu provadu basa iha lezada nia hasan karuk, tuku dala ida iha kanuruk, arguidu kontinua hodi ai-sar baku dala lima iha lezada nia ulun parte kotuk no dudu lezada monu ba kama leten. Provadu mós katak arguidu tuku tan lezada nia kanuruk dala ida.

Bazeia ba faktu provadu hirak ne'e no tetu mós ho sirkunstánsia hotu-hotu, tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

2. Krime ofensa ba integridade fízika simples ho natureza VD

Nú. Prosesu : 0041/24.DICMR
Kompozisaun Tribunál : Singulár
Juis : Dr. João Ribeiro
Prokuradór : Dra. Ivonia M. Guterres
Defeza : Dr. Manuel Amaral
Desizaun : Pena prizaun fulan 4 suspende ba tinan 1

Iha 21 Juñu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza VD ne'ebé envolve arguidu Sd hasoru nia feen, iha Munisípiu Dili.

Akuzasaun Prokuradora

Prokuradora akuza katak iha 13 Janeiro 2024, iha oras tuku 21:38 kalan, arguidu tuku dala tolu kona iha lezada nia kotuk laran hodi rezulta moras no mean. Kazu ne'e akontese bainhira arguidu fila uma ho kondisaun lanu haruka lezada atu kumu arguidu nia isin no lezada ba foti mina atu ba kumu maibé arguidu la kohi fali no halo agresaun hasoru lezada.

Prokuradora akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak depoisde akontesimentu ne'e sira di'ak malu fali no promete katak iha futuro sei la komete tan krime hasoru lezada.

Lezada iha nia deklarasaun konfirma faktu hotu iha akuzasaun no deklarata katak depoisde akontesimentu ne'e, di'ak malu fali ho arguidu.

Alegasaun finál

Prokuradora konsidera arguidu provadu komete krime hasoru lezada tuir konfisaun arguidu nian no konfirma hosi lezada, haree sirkunstánsia atenuante ne'ebé haleu hela krime ne'e, prokuradora husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu kondena arguidu ho pena admoestasaun tanba arguidu kolabora ho tribunál, arrepende ninia hahalok no di'ak malu ona ho lezada.

Desizaun

Depois avalia faktu hotu, tribunál prova katak, arguidu provadu tuku dala tolu kona iha kotuk laran hodi rezulta moras no mean.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena prizaun fulan haat supende ba tinan ida.

3. Krime ofensa ba integridade física simples ho natureza VD

Nú. Prosesu	: 0088/23.ERSIC
Kompozisaun Tribunál	: Singulár
Juis	: Dr. João Ribeiro
Prokuradór	: Dra. Ivonia M. Guterres
Defeza	: Dra. Agustinha de Oliveira
Desizaun	: Pena multa US\$45.00

Iha 28 Juñu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza VD ne'ebé envolve arguidu DMUM hasoru nia feen, iha Munisípiu Ermera.

Akuzasaun Prokuradora

Prokuradora akuza katak iha 24 Agostu 2023, iha oras tuku 16:00 lokraik, arguidu lori telefone tuda iha lezada nia matan fukun, ne'ebé rezulta matan fukun kanek no ran sai maka'as no halo lezada trauma no sente tauk. Kazu ne'e akontese bainhira arguidu ho lezada diskuti malu kona-ba lezada deskunfia arguidu fila hosi festa, tula fetu seluk.

Prokuradora akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklara katak depoisde akontesimentu ne'e sira di'ak malu fali no promete iha futuru sei la komete tan krime hasoru lezada.

Alende ne'e, lezada mós konfirma faktu hotu iha akuzasaun no deklara katak depoisde akontesimentu ne'e, di'ak malu fali ho arguidu no nafatin moris hamutuk hanesan feen ho laen.

Alegasaun finál

Prokuradora konsidera arguidu provadu komete krime hasoru lezada, tuir konfisaun arguidu nian no konfirma mós hosi lezada, arguidu halo duni agresauñ fízika hasoru lezada no tetu mós sirkunstánsia atenuante ne'ebé haleu hela krime ne'e, prokuradora husu ba tribunál atu kondena arguidu ho pena multa.

Entretantu, defeza iha nia alegasaun husu ba tribunál atu kondena arguidu ho pena admoestasaun tanba arguidu kolabora diak ho tribunál, arrepende ninia hahalok no di'ak malu ona ho lezada.

Desizaun

Depoisde avalia faktu hotu, tribunál prova katak, arguidu provadu lori telefone tuda iha lezada nia matan fukun, hodi rezulta lezada nia matan fukun kanek no raan sai maka'as. Prova mós katak agresauñ ne'e halo lezada sente ta'uk no trauma.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu kada liron US\$1.00 durante liron 45. Tribunál mós fixa pena alternativa durante liron 30 iha prizaun, kuandu arguidu la selu pena multa refere.

4. Krime ofensa ba integridade fízika simples ho natureza VD

Nú. Prosesu : 0002/23.ERATB
Kompozisaun Tribunál : Singulár
Juis : Dr. José Goncalvés
Prokuradór : Dr. Ricardo Leite Godinho
Defeza : Dr. José da Silva
Desizaun : Pena prizaun fulan 4 suspende ba tinan 1

Iha 7 Juñu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza VD ne'ebé envolve arguidu VS hasoru nia feen, iha Munisípiu Ermera.

Akuzasaun Prokuradór

Prokuradór akuza katak iha 22 Marsu 2023, iha oras ne'ebé haluha ona, arguidu baku dala rua iha lezada nia ulun nune'e rezulta bubu no moras. Kazu ne'e akontese bainhira lezada husu arguidu kona-ba arguidu atu hola tan fetu seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente katak nia baku duni dala ida iha lezada nia ulun tanba lezada dehan kuañdu arguidu hola tan fetu seluk, labarik sira lezada la haree ona, nune'e halo arguidu nervozu hodi halo agresaun. Arguidu hatutan katak hafoin akontesimentu ne'e lezada ho arguidu hela separadu no lezada ho labarik sira ba hela hamutuk ho nia inan aman iha foho.

Entretantu, lezada iha nia deklarasaun kontinua konfirma faktu hotu iha akuzasaun katak arguidu baku dala rua iha lezada nia ulun rezulta bubu no moras, lezada mós konfirma katak depoisde akontesimentu ne'e, sira hela separadu durante tinan ida ona, maibé arguidu nunka sustenta labarik sira.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun parsial hosi arguidu no konfirma mós hosi hosi lezada, arguidu halo duni agresaun fízika hasoru lezada, nune'e haree ba sirkunstánsia sira ne'ebé haleu hela krime ne'e, Prokuradór husu ba tribunál atu kondena arguidu ho pena multa.

Defeza iha nia alegsaun konkorda ho alegasaun prokuradór nian maibé husu atu tribunál tetu no konsidera sirkunstánsia hotu-hotu ne'ebé iha no kondena arguidu tuir arguidu ninia rendementu.

Desizaun

Depois avalia ba faktu hotu, tribunál prova katak, arguidu provadu baku dala rua iha lezada nia ulun, prova katak arguidu nia aktu ne'e rezulta lezada nia ulun bubu no moras. Prova mós katak depoisde akontesimentu ne'e lezada ho nia oan sira ba hela hamutuk ho nia inan aman iha foho, arguidu la sustenta nia oan sira.

Bazeia ba faktu provadu hirak ne'e no tetu mós ho sirkunstánsia hotu-hotu, tribunál konklui prosesu ne'e no kondena arguidu ho pena prizaun fulan haat supende ba tinan ida.

5. Krime ofensa ba integridade fízika simples ho natureza VD

Nú. Prosesu : 0120/23.DICMR
Kompozisaun Tribunál : Singulár
Juis : Dr. José Gonsalves
Prokuradora : Dra. Ivonia M. Guterres
Defeza : Dr. José da Silva
Desizaun : Pena Multa US\$90.00

Iha 7 Juñu 2024, Tribunál Judisiál Primeira Instánsia Dili prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu PB hasoru nia feen, iha Munisípiu Dili.

Akuzasaun Prokuradora

Prokuradora akuza katak iha 2 Marsu 2024, iha oras tuku 15:00 lokraik, arguidu tuku dala ida iha lezada niaibun no tuku dala ida iha kaba'as, arguidu kontinua tebe tan dala ida iha ain parte karuk halo lezada monu tun ba rai. Aktu ne'e rezulta lezada nia nehan ida monu. Problema ne'e akontese bainhira lezada diksuti malu ho arguidu tanba lezada hare arguidu lori fetu seluk tama ba kuartu laran.

Prokuradora akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa parsial ba faktu iha akuzasaun katak nia halo agrsaun refere hasoru lezada tanba lezada maka kaer uluk arguidu nia kamiza nia gola hodi sira dudu malu, iha dudu malu ne'e lezada monu tun ba rai, arguidu deklara katak nia la tuku maibé basa deit dala ida iha hasan. faktu kona-ba lezada nia nehan monu ne'e arguidu deklara la hatene. Arguidu so haree de'it lezada niaibun raan.

Lezada iha nia deklarasaun konfirma hotu faktu iha akuzasaun no deklara katak depoisde akontesimentu ne'e arguidu husu ona deskulpa ba lezada no fó indemnizasaun ba lezada ho osan hamutuk US\$500.00 no kontinua moris hamutuk hanesan feen ho la'en.

Alegasaun finál

Iha alegsaun prokuradora konsidera arguidu provadu komete krime hasoru lezada tuir konfirmasaun hosi lezada no konfisaun parsila hosi arguidu, prokuradora prova katak arguidu halo duni agresaun fizika hasoru lezada, tanba ne'e husu ba tribunal atu haree sirkunstansia hotu ne'ebé haleu hela krime ne'e no kondena arguidu ho pena multa.

Entretantu, defeza husu ba tribunál atu tetu didi'ak no fó desizaun ne'ebé justu tanba iha kazu ne'e, lezada mak kaer uluk arguidu nia kameza nia gola nune'e sira dudu malu no iha dudu malu ne'e lezada monu tun ba iha rai no lezada nia nehan ida monu, lezada nia nehan monu ne'e laos arguidu mak tuku. Arguidu kolabora ho tribunál, arrepende ninia hahalok no di'ak malu ona ho lezada no fó sala arguidu selu ona dolar US\$ 500,00 ba lezada.

Desizaun

Depois avalia faktu sira ne'ebé prodús iha julgamentu, tribunál prova katak, arguidu provadu tuku dala ida iha lezada nia ibun no tuku dala ida iha kabas no kontinua tebe tan dala ida iha ain parte karuk, halo lezada monu tun ba rai no rezulta lezada nia nehan ida monu. Prova mós katak fó sala arguidu selu indemnizasaun ba lezada ho montante osan US\$500.00 lezada no sira kontinua moris hamutuk hanesan feen ho la'en.

Bazeia ba faktu provadu sira ne'e no tetu mós sirkunstansia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$90.00 ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante durante fulan 30 prizaun kuandu arguidu la kumpri pena multa refere.

6. Krime aktu seksuál ho adolexente

Nú. Prosesu	: 0053/2022/ERSIC
Kompozisaun Tribunál	: Singulár
Juis	: Dr. Ana Paula Fonseca
Prokuradór	: Dr. Simião Brito Seixas
Defeza	: Dr. Marçal Mascarinhas
Desizaun	: Pena prizaun tinan 6

Iha 06 Juñu 2024, Tribunál Judisiál Primeira Instánsia Dili prezide leitura sentensa ba krime aktu seksuál ho adolexente ne'ebé envolve arguidu AP hasoru lezada ho idade tinan 15, iha Munisípiu Ermera.

Akuzasaun Prokuradór

Prokuradór akuza katak iha loron ne'ebé lezada la lembra maibé iha fulan Maiu 2022, iha tuku 15:00 lokraik, lezada lori kafe ba nia avo nia uma, iha kafe laran arguidu bolu lezada hodi hadau tiha kafe iha lezada nia bote hodi soe ba mota, arguidu kaer no rasta lezada ba kafe laran hodi ameasa lezada dehan "ó hakilar hau lori ai-baku mate ó". Arguidu komesa kolu lezada nia kalsa ho roupa, halo lezada hakilar ho ta'uk, arguidu

kontinua ameasa lezada no kolu hotu lezada nia roupa hodi dudu lezada ba du'ut laran no halo relasaun seksuál ho lezada.

Tuir iha loran no tinan ne'ebé lezada la lembra, maibé iha oras tuku 18:00 lokraik, bainhira lezada atu ba reza, arguidu kontinua hein lezada iha kafe laran no ho maneira hanesan lori lezada ba kafe laran ho obriga halo relasaun seksuál ho lezada. Arguidu halo relasaun seksuál ho lezada hamutuk dala neen iha loran ne'ebé la hanesan iha fatin hanesan, ho meu obriga no ameasa.

Prokuradór akuza arguidu kontra artigu 178 KP kona-ba aktu seksuál adolexente ho moldura penál to'o tinan 5 prizaun.

Produsaun ba prova sira

Iha prosesu julgamentu, arguidu konfesa faktu balu iha akuzasaun katak nia halo duni relasaun seksuál ho lezada, maibé relasaun seksuál ne'e halo de'it dala tolu, iha fatin hanesan iha kafe laran. Arguidu mós konfesa katak loos duni halo relasaun seksuál no sempre ameasa lezada, maibé halo dala haat de'it laos dala neen, ba dala haat ne'e mak lezada nia tiu kaer toman no ba keixa iha Polísia.

Entretantu, lezada kontinua konfirma faktu sira iha akuzasaun no deklarata katak relasaun seksuál ne'ebé arguidu halo ne'e hamutuk dala neen, no sempre ameasa lezada halo ta'uk foin halo relasaun seksuál ho lezada.

Testemuña CM nu'udar lezada nia tiu depoimenta katak, kuandu nia lao hela iha kafe laran derepenti haree arguidu halo hela relasaun seksuál ho lezada. Nune'e testemuña mós ba kesar kedas iha Polísia.

Alegasaun finál

Prokuradór konsidera arguidu provadu komete krime aktu seksuál adolexente hasoru lezada bazeia ba konfisaun partiál hosi arguidu, konfirmasaun hosi lezada no deklarasaun hosi testemuña, bazeia ba faktu provadu sira ne'e prokuradór husu ba tribunál atu kondena arguidu ho pena prizaun tinan sanulu.

Entretantu, defeza husu ba tribunál atu kondena arguidu ho pena prizaun suspende ninia ezekusaun ho konsiderasaun katak, arguidu kolabora ho tribunál no arrepende ona ninia hahalok.

Desizaun

Depoisde avalia faktu sira ne'ebé prodús iha julgamentu, tribunál prova katak iha loran ne'ebé lezada la lembra maibé iha fulan Maiu 2022, iha lokraik lezada atu lori kafe ba nia avo nia uma, maibé iha kafe laran arguidu bolu lezada hodi hadau tiha kafe iha lezada nia bote no soe ba mota, tuir mai arguidu kaer no rasta lezada ba kafe laran hodi ameasa lezada dehan "ó hakilar hau lori ai baku mate ó". Arguidu komesa kolu lezada nia roupa, dudu lezada ba du'ut laran hodi halo relasaun seksuál ho lezada.

Iha akontesimentu tuir fali iha loron no fulan ne'ebé lezada la lembra, lezada atu ba reza iha tuku 18:00 lokraik, arguidu hein tan lezada iha kafe laran ho aktu hanesan, arguidu obriga lezada hodi halo relasaun seksuál. Prova mós katak arguidu halo relasaun seksuál ho lezada hamutuk dala neen.

Bazeia ba faktu provadu hirak ne'e tribunál, nune'e tribunál konklui prosesu ne'e no kondena arguidu ba kada krime ho pena prizaun tinan rua no halo komulasaun ba pena hodi aplika pena prizaun tinan neen.

7. Krime ofensa ba integridade fízika simples ho natureza VD

Nú. Prosesu : 0022/23.ERHAT
Kompozisaun Tribunál : Singulár
Juis : Dra. Jumiaty Freitas
Prokuradór : Dr. Ricardo Leite Godino
Defeza : Dr. Marçal Mascarinhas
Desizaun : Absolve

Iha 7 Juñu 2024, Tribunál Judisiál Primeira Instánsia liuhosi julgamentu movel iha Munisípiu Ermera prezide leitura sentensa ba krime ofensa ba integridade fízika simples ho natureza VD ne'ebé envolve arguidu JBS hasoru nia feen, iha Munisípiu Ermera.

Akuzasaun Prokuradór

Prokuradór akuza katak iha 15 Dezembru 2023, iha oras tuku 14:45 lokraik, arguidu foti ai-kafe maran ida hodi baku iha lezada nia kotuk laran no fai iha lezada nia liman laran to'o lezada nia liman laran kanek. Durante moris hamutuk hanesan feen ho la'en arguidu sempre baku lezada. Arguidu nia aktu ne'e rezulta kanek no mean iha lezada nia liman no kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu nega hotu faktu iha akuzasaun no deklarasaun katak lezada maka sempre baku arguidu, durante sira hola malu lezada maka sempre hasai liafuan ladi'ak hasoru arguidu. Kuandu sira diskute malu lezada sempre hanoin aat ba nia-an no soe-an ba iha rai naruk. Entretantu kona-ba lezada nia fitar iha isin loloon ne'e tanba lezada atu soe-an ba rai naruk nune'e arguidu tenta atu salva mak sira na'in rua monu no rezulta lezada hetan kanek iha liman no isin loloon mean no moras.

Entretantu, lezada iha nia deklarasaun konfirma deklarasaun arguidu nian katak loos duni laos arguidu mak baku lezada maibé tanba durante arguidu serbisu la fó osan ba lezada nune'e lezada apresenta keixa. Lezada mós deklarasaun katak dala ruma lezada atu soe-an tanba arguidu simu osan la fó lezada.

Alegasaun finál

Iha alegsaun prokuradór konsidera faktu sira ne'ebe lezada fo iha investigasaun ne'e la los nue'e prokuradór husu ba tribunál atu absolve arguidu hosi krime ne'e.

Entretantu defeza iha nia alegsaun aseita ho pedidiu hosi prokuradór nian no husu ba tribunál atu absolve arguidu hosi krime ne'e.

Desizaun

hafoin avaliasaun ba faktu sira ne'ebé prodús iha julgamentu, tribunál la prova katak arguidu halo agresan fízika hasoru lezada hanesan iha akuzasaun nune'e tribunál decide hodi absolve arguidu hosi krime ne'e.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>